

新

序

新

序

新序敘

古之治天下者一道德同風俗蓋九州之廣萬民之眾千歲之遠其教既明其政既成之後所守者一道所傳者一說而已故詩書之文厯世數十作者非一而言未嘗不相爲終始化之如此其至也當是之時異行者有誅異言者有禁防之又如此其備也故二帝三王之際及其中間嘗更衰亂而餘澤未熄之時百家眾說未有能出其間者也及周之末世先王之教化法度既廢餘澤既熄世之治方術者蓋得其一偏故人奮其私意家尚其私學學者蠡起於中國皆明其所長而昧其所短務其所得而諱其所失天下之士各自爲言而不能相通世人之不復知夫學之有統道之有歸也先王之遺文雖在皆絀而不講況至於秦爲世所大禁哉漢興六藝皆得於散絕殘脫之餘世無

復明先王之道爲眾說之所蔽闇而不明鬱而不發而怪奇可喜之論各師異見皆自名家者誕漫於中國一切不異於周之末世其弊至於今尙在也自斯以來天下學者知折衷於聖人而能純於道德之美者揚雄氏而止耳如向之徒皆不免爲眾說之蔽而不知有折衷者也孟子曰待文王而後興者凡民也豪傑之士雖無文王猶興漢之士豈特無明先王之道以一之者哉亦其出於是時者豪傑之士少故不能特起於流俗之中絕學之後也蓋向之序此書於今最爲近古雖不能無失然遠至舜禹而次及於周秦以來古人之嘉言善行亦往往而在也要在慎取之而已故臣旣惜其不可見者而校其可見者特詳焉亦足以知臣之志者豈好辯哉蓋臣之不得已也編校書籍

新序卷一

漢沛郡劉向撰

雜事第一

昔者舜自耕稼陶漁而躬孝友父瞽瞍頑母嚚及弟象傲皆下愚不移舜盡孝道以供養瞽瞍瞽瞍與象爲浚井塗廩之謀欲以殺舜舜孝益篤出田則號泣年五十猶嬰兒慕可謂至孝矣故耕於歷山歷山之耕者讓畔陶於河濱河濱之陶者器不苦窳漁於雷澤雷澤之漁者分均及立爲天子天下化之變夷率服北發渠搜南撫交趾莫不慕義麟鳳在郊故孔子曰孝弟之至通於神明光於四海舜之謂也孔子在州里篤行孝道居於闕黨闕黨之子弟畋漁分有親者得多孝以化之也是以七十子自遠方至服從其德魯有沈猶氏者且飲羊飽之以欺市

人公慎氏有妻而淫潰氏奢侈驕佚魯氏之鬻牛馬者善豫
賈孔子將爲魯司寇沈猶氏不敢朝飲其羊公慎氏出其妻慎
潰氏踰境而徙魯之鬻馬牛不豫賈布正以待之也旣爲司寇
季孟墮郈費之城齊人歸所侵魯之地由積正之所致也故曰
其身止不令而行

孫叔敖爲嬰兒之時出遊見兩頭蛇殺而埋之歸而泣其母問
其故叔敖對曰聞見兩頭之蛇者死嚮者吾見之恐去母而死
也其母曰蛇今安在曰恐他人又見殺而埋之矣其母曰吾聞
有陰德者天報以福汝不死也及長爲楚令尹未治而國人信
其仁也

禹之興也以塗山桀之亡也以末喜湯之興也以有莘紂之亡
也以妲己文武之興也以任姒幽王之亡也以褒姒是以詩正

關雎而春秋褒伯姬也樊姬楚國之夫人也楚莊王罷朝而晏
問其故莊王曰今日與賢相語不知日之晏也樊姬曰賢相爲
誰王曰爲虞丘子樊姬掩口而笑王問其故曰妾幸得執巾櫛
以侍王非不欲專貴擅愛也以爲傷王之義故所進與妾同位
者數人矣今虞丘子爲相數十年未嘗進一賢知而不進是不
忠也不知是不智也安得爲賢明日朝王以樊姬之言告虞丘
子虞丘子稽首曰如樊姬之言於是辭位而進孫叔敖孫叔敖
相楚莊王卒以霸樊姬與有力焉

衛靈公之時蘧伯玉賢而不用彌子瑕不肖而任事衛大夫史
鮪患之數以諫靈公而不聽史鮪病且死謂其子曰我卽死治
喪於北堂吾不能進蘧伯玉而退彌子瑕是不能正君也生不
能正君者死不當成禮置尸北堂於我足矣史鮪死靈公往弔

見喪在北堂問其故其子具以父言對靈公靈公蹴然易容寤然失位曰夫子生則欲進賢而退不肖死且不懈又以尸諫可謂忠而不衰矣於是乃召蘧伯玉而進之以爲卿退彌子瑕徙喪正堂成禮而後返衛國以治史鮪字子魚論語所謂直哉史魚者也

晉大夫祁奚老晉君問曰孰可使嗣祁奚對曰解狐可君曰非子之讎耶對曰君問可非問讎也晉遂舉解狐後又問孰可以爲國尉祁奚對曰午也可君曰非子之子耶對曰君問可非問子也君子謂祁奚能舉善矣稱其讎不爲諂立其子不爲比書曰不偏不黨王道蕩蕩祁奚之謂也外舉不避仇讎內舉不回親戚可謂至公矣唯善故能舉其類詩曰唯其有之是以似之祁奚有焉

楚共王有疾召令尹曰常侍筦蘇與我處常忠我以道正我以義吾與處不安也不見不思也雖然吾有得也其功不細必厚爵之申侯伯與處常縱恣吾吾所樂者勸吾爲之吾所好者先吾服之吾與處歡樂之不見戚戚也雖然吾終無得也其過不細必亟遣之令尹曰諾明日王薨令尹卽拜筦蘇爲上卿而逐申侯伯出之境曾子曰烏之將死其鳴也哀人之將死其言也善言反其本性共王之謂也故孔子曰朝聞道夕死可矣於以開後嗣覺來世猶愈沒身不寤者也

昔者魏武侯謀事而當羣臣莫能逮朝而有喜色吳起進曰今者有以楚莊王之語聞者乎武侯曰未也莊王之語奈何吳起曰楚莊王謀事而當羣臣莫能逮朝而有憂色申公巫臣進曰君朝而有憂色何也莊王曰吾聞之諸侯自擇師者王自擇友

者霸足已而羣臣莫之若者亡今以不穀之不肖而議於朝且羣臣莫能逮吾國其幾於亡矣吾是以有憂色也莊王之所以憂而君獨有喜色何也武侯逡巡而謝曰天使夫子振寡人之過也天使夫子振寡人之過也

衛國逐獻公晉悼公謂師曠曰衛人出其君不亦甚乎對曰或者其君實甚也夫天生民而立之君使司牧之無使失性良君將賞善而除民患愛民如子蓋之如天容之若地民奉其君愛之如父母仰之如日月敬之如神明畏之若雷霆夫君神之主也而民之望也天之愛民甚矣豈使一人肆於民上以縱其淫而棄天地之性乎必不然矣若困民之性乏神之祀百姓絕望社稷無主將焉用之不去何爲公曰善

趙簡子上羊腸之坂羣臣皆偏袒推車而虎會獨擔戟行歌不

推車簡子曰寡人上坂羣臣皆推車會獨擔戟行歌不推車是
會爲人臣侮其主爲人臣侮其主其罪何若虎會對曰爲人臣
而侮其主者死而又死簡子曰何謂死而又死虎會曰身死妻
子又死若是謂死而又死君旣已聞爲人臣而侮其主者之罪
矣君亦聞爲人君而侮其臣者乎簡子曰爲人君而侮其臣者
何若虎會對曰爲人君而侮其臣者智者不爲謀辯者不爲使
勇者不爲鬪智者不爲謀則社稷危辯者不爲使則使不通勇
者不爲鬪則邊境侵簡子曰善乃罷羣臣不推車爲士大夫置
酒與羣臣飲以虎會爲上客

昔者周舍事趙簡子立趙簡子之門三日三夜簡子使人出問
之曰夫子將何以令我周舍曰願爲諤諤之臣墨筆操牘隨君
之後司君之過而書之曰有記也月有效也歲有得也簡子悅

之與處居無幾何而周舍死簡子厚葬之三年之後與諸大夫
飲酒酣簡子泣諸大夫起而出曰臣有死罪而不自知也簡子
曰大夫反無罪昔者吾友周舍有言曰百羊之皮不如一狐之
腋眾人之唯唯不如周舍之謬謬昔紂昏昏而亡武王謬謬而
昌自周舍之死後吾未嘗聞君過也故人君不聞其非及聞而
不改者亡吾國其幾於亡矣是以泣也

魏文侯與士大夫坐問曰寡人何如君也羣臣皆曰君仁君也
次至翟黃曰君非仁君也曰子何以言之對曰君伐中山不以
封君之弟而以封君之長子臣以此知君之非仁君文侯大怒
而逐翟黃黃起而出次至任座文侯問寡人何如君也任座對
曰君仁君也曰子何以言之對曰臣聞之其君仁者其臣直向
翟黃之言直臣是以知君仁君也文侯曰善復召翟黃入拜爲

上卿

中行寅將亡乃召其太祝而欲加罪焉曰子爲我祝犧牲不肥
澤耶且齋戒不敬耶使吾國亡何也祝簡對曰昔者吾先君中
行穆子皮車十乘不憂其薄也憂德義之不足也今主君有革
車百乘不憂德義之薄也唯患車不足也夫舟車飾則賦斂厚
賦斂厚則民怨謗詛矣且君苟以爲祝有益於國乎則詛亦將
爲損世亡矣一人祝之一國詛之一祝不勝萬詛國亡不亦宜
乎祝其何罪中行子乃慚

秦欲伐楚使使者往觀楚之寶器楚王聞之召令尹子西而問
焉曰秦欲觀楚之寶器吾和氏之璧隨侯之珠可以示諸令尹
子西對曰不知也召昭奚恤而問焉昭奚恤對曰此欲觀吾國
得失而圖之不在寶器在賢臣珠玉玩好之物非寶重者王遂

使昭奚恤應之昭奚恤發精兵三百人陳於西門之內爲東面之壇一爲南面之壇四爲西面之壇一秦使者至昭奚恤曰君客也請就上位東面令尹子西南面太宗子敖次之葉公子高次之司馬子反次之昭奚恤自居西面之壇稱曰客欲觀楚國之寶器楚國之所寶者賢臣也理百姓實倉廩使民各得其所令尹子西在此奉珪璧使諸侯解忿悁之難交兩國之歡使無兵革之憂太宗子敖在此守封疆謹境界不侵鄰國鄰國亦不見侵葉公子高在此理師旅整兵戎以當彊敵提枹鼓以動百萬之眾所使皆趨湯火蹈白刃出萬死不顧一生之難司馬子反在此懷霸王之餘議攝治亂之遺風昭奚恤在此唯大國之所觀秦使者懼然無以對昭奚恤遂揖而去秦使者反言於秦君曰楚多賢臣未可謀也遂不伐楚詩曰濟濟多士文王以寧

斯之謂也

晉平公欲伐齊使范昭往觀焉景公賜之酒酣范昭曰願請君之樽酌公曰酌寡人之樽進之於客范昭已飲晏子曰徹樽更之樽觶具矣范昭佯醉不悅而起舞謂太師曰能爲我調成周之樂乎吾爲子舞之太師曰冥臣不習范昭趨而出景公謂晏子曰晉大國也使人來將觀吾政也今子怒大國之使者將奈何晏子曰夫范昭之爲人非陋而不識禮也且欲試吾君臣故絕之也景公謂太師曰子何以不爲客調成周之樂乎太師對曰夫成周之樂天子之樂也若調之必人主舞之今范昭人臣也而欲舞天子之樂臣故不爲也范昭歸以告平公曰齊未可伐也臣欲試其君而晏子識之臣欲犯其禮而太師知之仲尼聞之曰夫不出於樽俎之間而知千里之外其晏子之謂也可

謂折衝矣而太師其與焉

晉平公浮西河中流而歎曰嗟乎安得賢士與共此樂者船人固桑進對曰君言過矣夫劍產於越珠產江漢玉產昆山此三寶者皆無足而至今君苟好士則賢士至矣平公曰固桑來吾門下食客者三千餘人朝食不足暮收市租暮食不足朝收市租吾尚可謂不好士乎固桑對曰今夫鴻鵠高飛沖天然其所恃者六翮耳夫腹下之毳背上之毛增去一把飛不爲高下不知君之食客六翮邪將腹背之毳也平公默然而不應焉

楚威王問於宋玉曰先生其有遺行邪何士民眾庶不譽之甚也宋玉對曰唯然有之願大王寬其罪使得畢其辭客有歌於郢中者其始曰下里巴人國中屬而和者數千人其爲陽陵採薇國中屬而和者數百人其爲陽春白雪國中屬而和者數十

人而已也引商刻角雜以流徵國中屬而和者不過數人是其
曲彌高者其和彌寡故鳥有鳳而魚有鯨鳳鳥上擊於九千里
絕浮雲負蒼天翱翔乎窈冥之上夫糞田之鵠豈能與之斷天
地之高哉鯨魚朝發崑崙之墟暴鬣於碣石暮宿於孟諸夫尺
澤之鯢豈能與之量江海之大哉故非獨鳥有鳳而魚有鯨也
士亦有之夫聖人瑰意奇行超然獨處世俗之民又安知臣之
所爲哉

晉平公閒居師曠侍坐平公曰子生無目朕甚矣子之墨墨也
師曠對曰天下有五墨墨而臣不得與一焉平公曰何謂也師
曠曰羣臣行賂以采名譽百姓侵冤無所告訴而君不悟此一
墨墨也忠臣不用用臣不忠下才處高不肖臨賢而君不悟此
二墨墨也姦臣欺詐空虛府庫以其少才覆塞其惡賢人逐姦